

玉山縣志卷二十二上

人物

名臣

宦業

理學

儒林

文苑

道德經濟莫盛於宋文章氣節莫著於明二者原不相離各從其優者目之而非彼此判然也生代嬗之際均不欲以自見則匿彩韜光要有不可磨滅者若夫孝友庸行天地爲經義烈精忠日星共炳郎至睦婣任卹其事已微然亦司徒六行所必書也志人物

名臣

宋

詹丕遠字子猷登進士第崇寧五年除右正言乞謹天戒上曰龍驤豈能當天變丕遠惶恐未諭上曰廐馬也一夕無疾而斃或者便爲星拂之致應天止如是耶丕遠對此語

玉山縣志

卷二十二上

人物志

一

欺甚不知陛下何從得之上作色曰京丕遠對京大臣宜省愆如此奏對大非昌言諫官陳瓘嘗劾京愚弄朝廷信有之也陛下知歸過於己天下幸甚上曰此語非欺則佞佞人殆丕遠對佞恐不足以盡京之過再進劄子乞罷修造及止絕諸司浮費并非汎錫予及論當十錢與令學者讀史切中時病除左正言論家安國不合獻移尙書省議上曰郎曹豈容當此人丕遠對外人言京待欲作宅第上曰庸有此京欲崇麗移之耳外人不知也只兩月前鄭居中朱諤來畱京要得賜第又爲京足疾乘騎難乞就近處踏逐朝廷亦未有指揮近處無以易省中居中莫意有所在否丕遠對外議謂陛下已許之矣上曰無但居中近亦來乞賜京第亦只欲得近便處且云以彗而罷京爲非若

不還京相天將動威當復有大雷電之恐此語殆劫持朕
異其請之必從丕遠對居中人謂京腹心陛下何以語之
上曰朕與他道星譴未久黜京以代朕責也銷災弭變尙
未知所出遽復京相天下謂何若要賜第却待商量丕遠
對觀此則昨來移省之請不無使之者皆人所不敢及後
卒爲惡直者所逐晚年優游鄉里人所推敬汪端明歸見
公乞言與之語有宜退不宜進宜貧不宜富宜怯不宜勇
之說有味其言也子堯謨堯可堯可知華亭縣有聲後知

房州

前志

祀鄉賢

按宋韓滄澗泉日記云徽宗語左正言詹丕遠曰比聞
中外有三不可之說法度不可變劉逵不可用蔡京不
可罷朕得之怵惕不寐者累夕丕遠因問劉逵何故不

玉山縣志

卷二十二上

人物志

二

可用上曰如碎黨人石刻寬上書繫籍人禁皆逵首陳
力爲朕論時政闕失有何不可用丕遠對此必有媒檄
逵者上曰今國是當如何丕遠曰是陛下當與挺之議
法度宜隨時損益逵用否在陛下若京不可不去上默
然此段即丕遠獲罪出知興化軍之由蓋除左正言論
移尙書省後語非除右正言論謹天戒時語宋史不載
可與編年備要參考

鄭驥字潛翁登元符三年進士第知溧陽縣歲饑民多逃亡
漕司按籍督逋賦不少貸驥患之盡去其籍使者欲繩以
法驥曰著令約二稅爲定數今不除則逋愈多民多貧賦
愈不辦使者不能屈時議自建康鑿漕渠導大湖以通大
江將破數州民田調江浙二十五州丁夫所費百萬計朝

廷遣官視可否驤條析利病力止之通判岢嵐軍改慶陽府姚古奏爲熙河蘭廓路經畧司屬官錢蓋自渭易熙奏辟幕下地震秦隴金城六城壞驤爲蓋言六城熙河重地宜趣繕治因自請董兵護築益機灘新堡六百步以控西夏堡成以功遷官賜緋衣銀魚吮厮羅氏舊據青唐置西寧州董氊入朝其弟益麻黨征走西夏大觀中羌人假其名歸附童貫奏賜姓名趙懷恭官團練使至是黨征自西寧求歸貫懼事露議者希貫意欲絕之驤謂貫欺君請辨其僞貫怒將厚誣以罪會敗而止擢京兆府等路提舉常平驤按格爲常平總目十卷頒之所部時陝右大稔驤奏乞以所部本息乘時廣糴得米六十萬斛高宗初以直秘閣知同州兼沿河安撫使時謀巡近甸金陵南陽長安爲

玉山縣志

卷二十二上

人物志

三

駐蹕計驤言南陽金陵偏方非興王地長安四塞天府之國可以駐蹕會帝東幸揚州復請自楚泗汴洛以迄陝華各募精兵首尾相應庶敵勢不得衝決不報金將婁宿犯同州及韓城驤遣兵拒險擊之師失利通判以下皆遁去驤曰所謂太守者守死而已翼日城陷驤赴井死贈通議大夫樞密直學士諡威愍驤在熙河嘗撫熙寧迄政和攻取建置之跡爲拓邊錄十卷兵將蕃漢雜事爲別錄八卷圖畫西蕃西夏回鶻盧甘諸國人物圖書爲河隴人物志十卷序贊普迄溪巴溫董氊世族爲蕃譜系十卷

宋史

祀鄉賢

楊萬里跋曰近世培溉人才志孝成俗至本朝盛矣唐季五代全軀賣國之風於是一變慶歷元祐之間忠臣義士

充盈朝野非諸老之賢祖宗之勤也其積豈一朝一夕哉
自紹聖崇觀之大臣指諸老爲邪奸挫握銷泯不盡不置
也而靖康之禍猶有死國如威愍鄭公者此固前日奸邪
之遺種而紹聖崇觀之大臣所銷泯不盡者邪噫慶歷元
祐之奸邪可少哉至於銷泯不盡可以觀祖宗之澤矣

誠

齋南海集

汪應辰字聖錫紹興五年進士第一人年甫十八初名洋特
改賜應辰上欲即除官職趙鼎言且令歷外任養成其材
乃授鎮東軍簽判鼎爲帥幕府事悉諮焉召爲秘書省正
字時秦檜力主和議金人欲以河南地歸我應辰上疏謂
和議不諧非所患和議諧矣而因循無備之可畏臣願勿
以和好爲無可虞而思患豫防常若敵人之至疏奏秦檜

玉山縣志

卷二十二上

人物志

四

大不悅出通判建州遂請祠以歸寓居常山之永年院益
以修身講學爲事張九成謫邵州交遊皆絕應辰時通問
及其喪父言者猶攻之而應辰不遠千里往弔通判袁州
凡所予奪人無異詞丞相趙鼎死朱崖扶喪過郡應辰爲
文祭之檜死召爲吏部郎官遷右司母老乞外出知婺州
尋丁內艱服闋除秘書少監權戶部侍郎三十二年建儲
以孝宗名與唐廬江王晉楚王同詔改爲燁應辰以爲與
唐昭宗同白左相陳康伯遂改今名集議秀王封爵應辰
定其稱曰太子本生之親暨內禪擬於傳位日降赦應辰
言唐太宗受禪於高祖明年正月始改元乃從其說又議
改元重熙應辰謂契丹嘗以紀年遂改隆興一朝大典禮
多應辰所定議乞補外知福州未幾升敷文閣待制舉朱

熹自代有鎮二年會朝廷謀蜀帥乃以敷文閣學士爲四川制置使知成都府既至免利路民餉運徙沿邊戍兵就糧內郡縱保勝義士復業存左藏所解白契二百萬以備不虞悉奏行之吳璘時駐蜀口武興精兵爲天下冠璘死應辰遂攝宣撫之職蜀道晏然入覲陞對以畏天愛民爲言尋兼翰林學士應辰在朝多革弊事中貴人皆側目力疾請祠自是卧家不起少從呂居仁胡安國遊見張栻呂祖謙深器許之

宋史

祀鄉賢

按呂東萊祭文定文曰旣予其資又乘其會蓋南□羣賢皆在之時而北方餘論未衰之際欵門墻而徧歷躋堂奧而獨詣合諸老之規模而融其異同總一代之統紀而攬其精粹著集五十卷程敏政於文淵閣得舊本

玉山縣志

卷二十二上

人物志

五

摘抄八卷刊行餘久散佚今四庫書錄永樂大典所載重爲編次鴻篇鉅製多非程本所有凡二十四卷直齋書錄解題謂有唐書列傳辨證翰林詞草玉山表奏

韓補字復善號思軒與兄祥同登嘉定癸未進士授朝奉郎知徽州爲政廉明每雞鳴視事據案尊嚴吏曹凜凜尋除淮西總領上曰韓總領一廉不可磨滅遣使南邦勅曰汝以拔萃之資負有爲之學故命汝特往使遠方殊俗知我有清白吏還對稱旨上嘉之在朝奏疏皆剴切以是忤時宰除寶文閣學士出知大平姦貪摧沮輒相戒曰是故嘗爲總領者不可犯也然治尙清靜民皆安之祥字履善號貞齋英資俊爽好學嗜文仕至吏部侍郎兼太子詹事表章周程張朱及從祀先聖廟庭諸議而百年之曠典以定

補守徽時建書院請祠朱子賜額紫陽兄弟宗朱程之學以文章德行顯名世稱二韓理宗御書翕和堂以榮之

參

採林志前志 並祀鄉賢

按祥趙蕃門人嘗請復舉嚴父配天之典朝散大夫康熙亦援倪思所著合宮爲言乃以寧宗與太祖太宗並侑明堂

明

詹瀚字汝約號燕峯由進士累官刑部郎中有張某者倚權璫盜官鈔瀚手疏按治之張伏辜京師肅然正德己卯武皇南巡瀚同姪行人軾諫尼被杖軾死杖下而瀚幸不死嘉靖甲申抗疏大禮再被杖事載明倫大典瀚兩受廷杖直聲益振時方倚重聞父疾求歸疏凡四上命未下輒行

玉山縣志

卷二十二上

人物志

六

事親至孝居喪哀毀骨立廬墓畢撰松城集擢湖廣藩臬吏民曰是嘗欲死諫者相戒莫敢犯所至有惠政□渭崖公首薦之轉浙江左布政使出納悉屬僚窠一毫不染拜都察院副都御史撫治鄖陽告病歸家居徒四壁杜門吟咏恬如也會漕河役興特召總理瀚建言曰利不當與水爭智不當與水鬪汲然惟支河是開長堤是防詳見於一政體明職守重運道諸疏適妖賊猝起瀚訓練河夫俄頃擒之其應變之才如此嘉靖丙午陞左侍郎己酉懇疏乞歸瀚侍從兩朝敷歷中外幾四十年家無羨積僅僅俸祿而已肅皇賜清修直節執法之臣二扁以褒美之所著有比部集振美堂稿治河奏議

前志參錄人物志

祀鄉賢

按明史嘉靖二十六年河決曹縣水入城二尺漫金鄉

魚臺定陶城武衝穀亭總河都御史詹瀚請於趙皮寨諸口多穿支河以分水勢詔可

夏子陽字鶴田由進士授紹興推官廉幹有卓異稱擢兵科給事中奉命冊封琉球先是萬歷二十八年中山王世子尙寧請封襲位命給諫洪瞻祖行人王士禎往待海寇息警渡海而瞻祖以憂去乃改命子陽子陽懼使命之逗遛以失信於外夷藩而負簡任也卽從前使琉球倉場尙書謝杰講求要領具疏責成地方撫按以三十一年癸卯冬十月入閩時撫按相繼歿造船官吏不力掣肘百端媒蘖萬狀按臣方元彥復以海上多事警報頻仍會巡撫徐學聚疏請仍遣武臣如許孚遠初議子陽以屬國言不可爽使臣義當有終乞堅成命慰遠人疏入未報禮部侍郎李

玉山縣志

卷二十二上

人物志

七

廷機言宜行領封初旨并武臣不必遣於是御史錢桓給事中蕭近高交章爭其不可謂此事當在欽命未定之前不當在冊封既遣之後宜敕所司速成海艘勿悞今歲渡海之期俟竣事復命然後定爲畫一之規先以文告令其領封海上永爲遵守帝納之乙巳七月乃命子陽速渡海竣事丙午三月海船成自昔奉使造舟未有若是之艱苦者遂於五月初四日啓行二十二日開洋六月朔世子遣法司王富等官來勞七月行封王禮是年中山百穀順成民間豐裕權若更生益信天朝之威德廣大也子陽居使館數月王候問宴會一如故事每次所餽宴金往復固却供應必稽覈節省夷衆悅服九月報倭將來寇子陽諭之曰若國雖弱小不可無備禦計吾爲爾輩策選兵礪刃據

守要害乃令王舅毛繼祖率夷衆禦守米牙磯無何倭數
舩至則賀國王及來貿易者也子陽下令禁從者勿與通
倭知有備斂戢不敢動請一見天使左右皆曰倭佩刀性
如犬羊勿與見子陽曰拒之是示怯也陳兵衛坐見之倭
稽顙再拜出語琉球曰見吾國王未嘗懼今見天使膽落
矣將返國王遣官慰畱躬自出餞十月十五日祭海登舟
歸途洶險幾隕其身顧謂士禎曰僕與君共使雖地方抑
鬱數年而於君命已幸不辱則使事畢矣今日之遇天也
當與君慷慨受之是時精誠所格神燈神雀屢顯靈異十
一月初三日入都復命賜一品服陞太常寺卿自是琉球
外禦日本強鄰內修貢不絕者四十年著琉球錄載鶴田
集中子九河舉人未仕卒

採明史鶴田集改撰 祀鄉賢

玉山縣志

卷二十二上

人物志

八

按孔子論士先使命不辱而本諸行己鶴田非行己有
素能却餽金籌官備以固夷情戒通市陳兵衛以落夷
膽乎若威德旣彰成命而反死豈所恤焉明史不立專
傳見於琉球傳中諸志徒以所著書載山川風俗物產
人民及所經屬國錯雜成文稱海國奇觀嗚呼何輕視
天下士也讀琉球錄猶見古名臣風矣

國朝

徐旭齡字敬庵父一鴻母昌氏崇禎壬申旭齡甫能言父挈
之依舅氏國華於錢唐順治乙未成進士歷試吏禮二曹
擢御史風采素著以廷尉鎮撫山東

聖祖南巡

書清漪以旌其潔尋陟司空出爲漕帥無弊不剔嘗一日

十上封事俱蒙

俞允以積勞卒年五十有九諡清獻

賜塋葬焉旭齡原配卒兩淮間無出繼娶樓恭人生女德音字淑則及勘災楊屬得訐迎年者乃丙午典試江南所取士之孫也以女字之後登庚辰進士官中書旭齡以從弟撫州教授望齡子嗣曰繼芳

採負骨記跋及徐潮碑文合

撰 新增

宦業

宋

王珉字中玉登進士第後爲侍從端重老成善楷書嘗作夢山堂一時名流如東萊呂舍人皆有題詠

華黼郡志

按朝野雜記乙集紹興二十五年春董使院德言王正

玉山縣志

卷二十二上 人物志

九

言珉並兼侍講非臺丞諫長而以侍講爲稱自此始則中玉官正言而兼侍講是時成進士四十一年矣

周世修字純德宣和進士知興國縣有平盜功簽書建康府錄諸將園田之逋欠者都督府以民居侵冒市衢檄令撤之拒弗聽子師清字畏知徽州婺源令好學有文

通志

徐仁

一作人

傑字漢英紹興進士故相趙忠簡深器重之後以

御史中丞廖剛薦得召對一日暮夜秦檜來招甚急適與客飲且醉客強請速往笑答曰醉不可往矣陞對惟以復仇耻清境土爲言遂忤檜請祿祠歸平生不治生產没之日惟圖書數篋而已著有檀弓傳易傳春秋發微

前府志

按忤檜請祠後提舉江西茶鹽任滿奉祠見明一統志俞疇字克晦畢從弟由太學登第爲安樂尉數獲強盜或以

應賞爲言疇曰盜爲民害尉任其責獲盜民安吾責塞矣
又因以爲利乎好爲詩名閒止集端明汪公爲之跋

前志

劉允迪字德華

一字桂亭

隆興進士知德安縣爲政一本儒術以

惠愛得民累官至朝奉郎參議沿海制置司軍事後居家
建義學以教族子弟及鄉人之願學者

通志

祀鄉賢

陳銘字日新博學能文淳熙進士判撫州剛方廉介不徇人
私嘗以考績至都適有天變因陳親正直遠奸佞黜臧濫
凡十事皆人所不敢言者特授奉訓大夫

通志

徐輝淳熙間令浮梁興學養士至今祠之

前府志

汪季良字子駟通直郎知平陽縣平陽號稱難治爲淞東三
陽之冠季良治有聲迺以一邑財計撰平陽會四卷自兩
稅而下爲二十一篇終於歲會旁通沿草本末大略備矣

玉山縣志

卷二十二上 人物志

十

又爲外篇五條如砧基副本催科檢放及書手除科敷之
類以爲此財用所從出也季良端明之孫且能吏也得年
不永士論惜之

直齋書曰解題

新增

明

詹恩字蓋臣由貴州戎籍登進士授大理評事轉本寺副居
官以廉平稱治家崇禮讓共孝友之性尤得之天成

志

前府

徐寄字寓安永樂辛卯舉人初任縣丞判嘉定州薦知內江
縣清白自守執法不阿爲權貴所嫉退歸鄉里文詞雅健
高古尙書蹇公重之嘗欲拔以顯職力辭不赴

續志

王受字謙益舉人任清城遂安丞薦授南京監察御史陞廣
西僉事景泰初酋賊韋萬秀攻掠慶遠甚亟受奉檄守禦

躬冒矢石又製飛鎗火箭一發九中賊懼而退及覃萬統寇天河累以奇兵破之軍民爲立生祠已而田州土官爭立制府委令坐鎮帖然無事致政歸天順八年進階一級節前府志

周銓字仲衡由進士歷知北流丹徒奉化縣廉靜寡欲擢御史陞四川參議所得俸入輒出以濟饑乏雖屢空弗恤也陞陝西按察使述職至京石亨知其賢數以禮鉤致之終不與接尋致仕行李蕭然同官贐以百金亦不受成化改元詔進階錫帛以旌其廉府志 祀鄉賢

祝同字秉文永樂間監生刑部主事擢河南參議有惠政以疾謝歸召陞湖廣布政使辭不赴前志

周鵬字雲翔由進士官刑曹陞山東僉事尋改汀漳兵備廉

玉山縣志

卷二十二上

人物志

十一

慎執法不敢干以私嘗平劇盜野王劉廷用等以不屈權貴謝事家居窘約如寒素性孝友微時因父疾不就鄉試又推所得繼產以給諸猶子之貧者全上 祀鄉賢

祝濬字仲源宏治進士累官刑部郎中時銓部辦事者倚勢凌毆御史同官者具云聞而後發濬奮然曰御史朝廷之憲臣以賤役犯之王法安在倘聞而有呵護何以明法竟置重典卽有所忤弗顧武皇南巡上疏諫止杖幾死考績例陞藩臬冢宰以濬素有廉名故置之鹽運以試之操守益勵毫無所染尋遷程番府知府惠愛流洽邊隅向風所著有苦行集致仕居家環堵蕭然卒之日無以爲殮邑人稱清白吏前府志

按通志選舉注濬宏蕃之孫誤濬祖啟先生鍾鎬鈺濬

鎬之子宏蕃鉦之子爲從父見弟

夏瑛字潤甫母楊少而寡嘗夜績以督瑛讀有孟母風瑛由鄉薦授醴陵令醴當要衝瑛請遷泗州驛於醴以均勞逸疲民得息肩土豪張某謀奪民田不遂竊刈禾民格殺之獄成抵死瑛援律請從末減輿論咸服貧民陳繼保輸官租容甚慘瑛叩之泣曰粥兩兒數猶未盈也瑛惻然贖還之以俸代輸賊劉齊寇湖湘間瑛設方畧禦之闔境無虞用薦陞廬州府馬政通判與印馬御史不合遂引疾歸置田膳族子浚舉進士別有傳

全上 祀鄉賢

舒瑞字天祥由舉人授蘓州通判三吳災民多逋負瑞設法催科革除常例民困遂蘓以忤上官判邵武府會衛軍作亂瑞討平之陞南雄府同知雄田舊無額豪强多兼并瑞

玉山縣志

卷二十二上

人物志

十二

爲區畫均齊至今賴之二郡皆祀名宦

全上

王輝義烏縣丞警敏有才遇事能決追徵得體力節夫役因忤總戎不屈解綬歸

義烏志

李玘字孟玉正德進士授浙江金華縣令有惠政章楓山先生稱之曰李侯奉法動職不爲容悅以求獲上語在金華修學記中陞工部主事監杭州抽分舊例法子每五十兩重五兩玘取重法子投諸井語其子曰此上欺當宁下賸脂膏吾不願以此爲若曹累也轉刑部員外郎飄然有解綬之想凡三疏而允家徒四壁縣令欲一見其面而不可得乃厚餽之玘不受報以詩曰金甌生塵久不炊忽聞餽廩喜盈眉滿庭官貺驚生眼一榻清風媿報施餓死祇須埋駿骨浮生豈敢負明時迂儒不爲饑寒恤種粟還應問

伯夷縉紳爭傳誦之玘令金華日過趙清獻祠輒下車瞻戀不忍去邑人立祠祀玘遂與清獻祠並峙嘉靖丁酉祀鄉賢

前府志

董良佐字茂衡私淑陽明之門由鄉薦知寧洋縣事寧洋故漳平陽巖地爲流賊蟠據當道奏立縣時方草勑良佐至首立鄉約擇耆德爲長躬至會所教以禮讓築城池建學宮定里甲均徭役清積逋勸耕種招流移諸務畢舉邑舊有鐵冶例金悉卻之民風丕變部院使交薦其賢陞鬱林守致仕

府志

鄭宗堯字允中由歲貢令長陽縣時張江陵執政嫺有王侍郎者來謁曰吾荆屬俱有庄惟長陽無今以此累先生宗堯笑曰大人天下爲家其何有於一邑也居官廉潔自盟

玉山縣志

卷二十二上

人物志

十三

三年謳歌載道撫按考最江陵相府在荆凡過門率下車公曰此君門禮也難乎爲上矣吾不能爲此遂解綬去士民追立去思碑亭居家優游泉石不一濡足公門年八十猶能作蠅頭細字日輯百家名言訓式子姓郡邑鄉飲率推舉大賓所著有青癭集

前府志

董繼周字茂文號八礫萬歷進士少貧力學博洽經史秦漢旁及形家言俱極精透初授海豐令豐文風久頓賴政餘磨切所拔葉高標姚恭等先後雋南宮尋擢刑部郎會邊警慷慨請纓抗疏三上不報居南部十載遷鄖陽守秩滿解組還家居杜門以著述山水自娛有八礫山房詩文集金魚社稿行世粵東政績載崇祀錄中

全上

國朝

姜天正字敬修號璞齋志學子丙午舉人隨父好讀有用書
癸酉旱饑率先賑濟粟盡繼以豆麥更戒家人啜粥以日
減餘粟接濟族隣後知武鄉縣甫數月卒武鄉故沁屬沁
州民有死而復甦者語人曰頃武鄉姜爺蒞城隍任予踴
躍爭睹爲快吏役傳呼甚厲遂驚蹶以起州牧長世圖聞
之喟然曰璞齋雖設施未究然甫蒞任而却鹽規革官價
清訟牘吾決其卒有所立乃今爲神命也喪歸邑人士重
爲於邑

厚畚初稿

李仲良字漢侯號澹齋乾隆丁巳進士知廣西平南縣平邑
向有田轉鬻而糧存者富據實產貧輸空稅仲良廉得其
隱即布令許以自陳設法更正計均攤荒糧百餘石至里
派總催兩稅是責民舍本業疲於奔命破家墊賠悉除之

玉山縣志

卷二十二上

人物志

十四

聽民自輸亦無逋賦古雍灘兩岸迫束復有盤渦水沸如
湯舟多覆溺乃傍灘更鑿水道期年功成榜人平安以過
往來爭頌之邑文風敝陋爲建武城書院延名師勤訓課
士興於學纂輯平南縣志十年俸滿調任天保又二年以
疾告歸

採平南志

邱宏謀字穀貽歲貢任南豐訓導雅懷高致邈然絕俗諸生
謝鳴謙工古文辭每見輒進辭說宏謀改容禮之會同官
某糾禍於先賢程山搆僉壬私毀其祠宏謀曰嗚呼程山
之學聞於天下祀鄉賢七十有五年此而可忍孰不可忍
力爲辯雪同官者適以他故罷去宏謀年近大耋告歸諸
生爲立教思碑

採南豐謝鳴謙墓誌

邱日榮字向宸號木亭五歲能屬對從祖宏謀學寓目成誦

補邑庠隨任南豐益肆志經史究心經濟己卯中式第二
闈中擬元數日矣辛巳春闈後遄歸抵家始聞捷音時宏
謀病篤越五日即世癸未入庶常館分習

國書改戶部主事授刑部山西司主事浙江司員外郎以御
史記名授奉天司郎中凡在刑部五年前後所讞獄悉歸
持平辛卯授福建道監察御史轉掌道署工科給事中巡
視天津漕務奏對有遺被議先是日榮奏請京員京察必
在本衙門歷俸三年方准一等及各省等員揀發凡應投
供者須供限滿方准揀選經部議駁至是蒙
上垂詢復下部詳悉酌定分別議行抵津糾查積弊復巡視
濟寧漕務其裨益漕政如在津時復

命詢東省年歲及地方情形奏對稱

玉山縣志

卷二十二上

人物志

十五

旨審大興宛平文童音署刑科給事稽查祿米倉事務京察
一等卒於官日榮幼時以母疾不應縣府試及疾革號搶
泣血不進湯粥累日既大祥猶有餘哀

節錄翁方綱撰行

畧

尹文炳字繡虎號孚軒父經綸繼娶徐生文炳兄弟四人文
炳以進士除知山東武城未抵任丁內外艱却海觀察聘
不赴服闋起攝商河篆有盜全保者高閎崇垣役捕爲其
耳目且拳捷能日行二百里邑令偶舉動輒遠颺坐不獲
免者二人文炳集健捕營卒給之曰牒送汝曹聽府差遣
匿不行者罪先授意弁尉具兵械行數里按笞其後至者
將抵盜所曰非赴府實擒盜也亟馳之弁尉率兵捕圍其
垣爭功排闥入盜擁白刃箕踞上坐弁尉股栗欲遁而文

炳至盜變色起問公何爲曰繫汝耳盜仰天歎曰不意公來何速也乞宥妻子慷慨受械他郡縣積案一鞫盡發其覆先是邑多豪衿挾制官長有十虎二十豹之目文炳密請於大吏牒下致數人於庭訊不服示以牒鞫治其罪餘皆斂跡令博興時東省飛蝗遍野成災者四十州縣文炳躬歷原野督捕凡旬有八日盡殲旃比秋博興賦獨登調任泰安大旱徒步行烈日中上泰山禱兩甫入城雨注歡徹街衢再調冠縣密邇元城巨盜江三與其黨往來竄匿文炳偵知夜率捕立擒之事

開晉知州旋授濟南同知庚子

高宗皇帝自江南回

鑾山左特擢沂州知府甲辰復南

玉山縣志

卷二十二上 人物志

十六

巡連日

召見

行在將大用以奏對不實致仕

以下新增

尹名選字衡齋號丹崖優貢充正白旗教習分發直隸知香河縣雪冤婦獄調吳橋丁內憂起補涑水縣恭辦

陵差三次不浮派而供頓立辦攝易州篆改知河間縣忤郡守乞假解任明年知蠡縣蠡西南蕭家灣小陳河所經地高水陡城當其衝不沒者三版名選思所以捍民患者非分疏以殺其勢不可條其議於當事報可即請帑疏鑿四里有竒護以堅隄四閱月渠成而瀦龍河決瀦龍河出中山唐水至祁州會沙滋經蠡東北入高陽南北兩岸逶迤七十餘里每歲修堤費出於民吏胥包辦爲奸以故卑薄

善潰名選更定爲法歲斂錢使各鄉之殷實者司其會屆期躬赴隄所戶置夫圩置長視勤惰而酌以直費減於前隄固於舊當事善之著爲令方河決時適名選巡河防秋取渡舟幾覆旣抵北岸雨傾盆汪衣履盡濕猶立隄上督民夫百計捍禦蝗起制府立捕蝗法名選曰官捕不如民自爲捕納蝗一石給百錢費私錢不及百緡而蝗盡瘞矣某邸司收者侵佔民地訟於官不直之即聽請當事名選持之益力蠡訟牘月以千計計日定程繼之以燭漏盡猶對狀剖決無倦容丁外憂歸卒先是蠡不登甲科五十餘年名選於治東建文昌閣戊辰捷南宮者二人蠡人爲立生祠紀德政於石有云心勞繼以力勞民事治如家事名選改爲龍神廟

王樹荀字守卿一字醇齋爲諸生試輒冠軍偕族弟樹芸肄業豫章一時名噪舉於鄉屢薦春闈旋大挑分發湖南署桃源縣事時苗匪滋事軍需旁午桃源當孔道差繹不絕先是縣中夫役照糧科派不勝困憊樹荀廉得其情革去糧差一切夫役胥出官雇民困以蘓凡爲治因民之敝擾以慈柔不務苛切解任之日遮道攀轅者四十里及署湘鄉則易慈柔爲剛斷不屑屑以煦嫗爲德湘俗狡而健訟且多水賊王文表者性黠暴爲湘匪渠魁哨聚逾千人藏匿水次商民皆爲所苦樹荀偵知蹤跡遣捕快往緝皆舌吐不能收樹荀誓除民害不盡不止因設法懸賞且密令其族首獲免罪未幾就擒解送正法賊黨潛蹤訟獄寢息民重樹荀之去亦如去桃源時也改任永順以疾卒樹荀

機警善謀在京時囊空無有能爲同郡鬻置會館於宣武門外之鐵門諸凡擘畫俱非儕輩所能測咸期之曰他日謀民事當如是會館矣其契券猶藏樹荀家 樹芸字書圃幼聰穎寓目成誦以鄉薦司訓清江論文不倦未數月疾卒

王樹芾字拜襄一字召亭由選拔試用直隸州州判分發湖南時苗匪滋事姜中丞一見心契招作行軍記室越數月假署湘潭朱亭丞事朱亭距縣治百里積賊譚姓尤爲民害樹芾莅任即領弓兵往捕賊首就擒餘黨散逸上官聞而賢之曰是真能急所當務者署武岡州州同歲大旱樹芾導以請水龍湫故法甫至山麓甘霖輒沛及卸篆留別詩有云山邨犬吠慚驅暴川澤龍呼快作霖蕎實滿田霜

玉山縣志

卷二十二上 人物志 十八

信晚機聲比屋月痕沈宦楚廿載餘清釐各州縣積案不下百數僚屬無敢以非禮干暇則以書畫詩文自娛

理學

宋

喻樗字子才由南昌徙嚴州十六世祖喻藥仕梁至安州刺史武帝賜姓爲喻樗性質直好議論少慕伊洛之學登建炎進士往謁趙鼎鼎時罷樞筦居常山因諷之曰公之事上當使啟沃多而施行少啟沃之際當使誠意多而語言少鼎竒之引爲上客紹興初鼎都督川陝辟爲屬高宗親征樗見鼎賀曰六龍臨江兵氣百倍然公自度此舉果出萬全乎或姑試一擲也鼎曰中國累年退避不振敵情益驕義不可更屈故贊上行耳若事之濟否則非鼎所知也

樗曰然則當思歸路毋以賊遺君父憂鼎問策將安出樗曰張德遠有重望今方居閩不可終棄若使爲江淮荆浙福建等路宣撫俾以諸道兵赴闕府庫軍旅錢糧皆得專之其來路即朝廷歸路也鼎善之入奏今沿江經畫大計略定非得大臣相應援不可帝曰然遂起浚知樞密院事浚至執鼎手曰此行舉措皆合人心鼎笑曰子才之功也樗自是往來鼎浚間多所裨益頃之薦授秘書正字兼史館校勘金旣退師鼎浚相得懽甚人以爲必並相樗獨言二人立事任人未甚相遠若同處相位萬有一不合則是賢者自相背戾矣又嘗譬推車者遇艱險則相詬病及車之止復欣然如初士大夫於國家亦若是而已後皆如其言久之檜怒樗先言和議非便言者希旨劾爲訕謗出知

玉山縣志

卷二十二上

人物志

十九

懷寧轉通判衡州檜死起爲大宗正丞轉工部員外郎知蘄州孝宗即位遷提舉浙東常平以治績聞淳熙七年卒平生善識鑒宣和間許其友沈晦當魁多士建炎初又謂張九成當第一凌景夏次之會風折大槐作二簡以遺後果然鼎嘗以樊光遠免舉事訪樗言今年省試不可無此人未幾光遠亦第一其二女方擇配不與富人後適汪洋

張孝祥咸及第

宏簡錄錄道學列傳

祀名宦

按前志樗受業龜山楊氏所著有大學中庸論語解玉泉語錄後家於玉卒葬北鄉喻村蓋初尉玉山在成進士之明年己酉而隆興改元提舉浙東後乃家玉山共道學實開文定父子之先雖祀名宦而實鄉賢也通志選舉喻樗注南昌人建德籍均就其始居地言玉泉在

黃谷山樗以爲號

江達字季路應辰子乾道進士官國子司業韓侂胄用事斥僞學善類皆不自安劉德秀因乞考核邪正眞僞所逐多名士達入劄子辨之德秀以達爲妄言并斥之間居七年參政李璧力言於朝嘉定初召爲太常卿累遷至吏部尙書

通志 祀鄉賢

按樵川慶元黨禁始末云僞黨共五十九人宰執趙忠定公爲首待制以上朱文公爲首餘官劉光祖爲首國子司業汪達居第十六侂胄伏誅黨錮諸臣以次召用矣

儒林

宋

玉山縣志

卷二十二上

人物志

二十

葉虞仲字聖參皇祐進士通判江州持身廉謹貧甚至不給饘粥有邦人解官歸者遽置田數十頃以誇虞仲虞仲笑曰吾貧不能辦此請以二十櫃書當之

明一統志 祀鄉賢

按聖參判睦州時爲福勝院記元豐八年乙丑也建炎三年玉泉尉玉山聖參下世已久又二年辛亥書碑陰宜傷不得見矣二十櫃書即碑陰語然則玉泉謂其好面折人其即所由出判江州也歟

李封字元伯少有俊聲累舉不第奮然自陳奉旨兩制覆試熙寧中以推恩授官晚年學益進稱鄉先生者必歸之

志

俞畢字克成紹興五年釋褐嘗知和永二州湍石喻提舉樗

誌其墓謂其在大學四方之人稱爲善類所厚善皆一時聞人所居學者漸漬薰蒸展轉成就爲不少其爲政簡而豫不表暴不詭隨雖自信而務盡人言故卒行其所無事

前志

汪涓字養源應辰之兄也踐履篤實有古君子風登進士第

爲中書舍人與應辰同處禁塗時稱二汪

通志

詹叔善字繼道紹興進士拜奉議郎諸王宮大小學教授滿歲即求致仕壽皇嘉之特官其子復賜誥有知止足勵士風之語先時叔善築書屋榜曰知止與詔語合秘書省校書郎吳興莫濟爲記其事中書舍人姑蘓范成大爲之銘人多題咏之其昆弟叔寧叔迴叔沅叔羲俱第進士而叔羲尤以文學著名於時

明一統志

祀鄉賢

玉山縣志

卷二十二上

人物志

二十一

程千里字偉明登進士第有經學嘗與范陽張侍郎講論後爲秘書省正字有書傳及雜著百篇

前府志

韓大寧字孝先紹興進士通洽經史有經世志嘗著續百將傳周易集註乾道間天子垂意治平因爲書正論十五以獻皆剴切精到天子覽而異之知饒州德興縣累有惠政敦孝崇禮用成美俗後終於官袁正肅公題其墓曰純孝先生之墓

明一統志

趙蕃字昌父其先鄭州人大父暘建炎初爲秘書少監提點坑冶寓信之玉山蕃以暘致仕恩補州文學爲太和主簿受知楊萬里調司理叅軍與郡守爭獄罷時稱其直其始受學劉清之因清之守衡求監安仁贍軍酒庫思以卒業既至適清之罷卽丐祠從以歸真德秀稱之曰昌父於師

友之際如此肯負國乎家居書祠官考者三十有一理宗立以大社令與劉宰同召不拜特改奉議郎直秘閣致仕卒年八十七蕃賦性寬平與人樂易而剛介亦不可奪年五十猶問學於朱熹既耄猶患末路之艱命所居曰難齋周必大與之契屢加引薦不受劉宰亦稱蕃曰文獻之家典型之彥巍然獨存有以繫學者之望一人而已信州守吳旂乞錄其後詔補其子遂

按遂字景初

上州文學亦辭以承

節 宋史

按四庫簡明目録載蕃著有乾道稿一卷淳熙稿二十卷章泉稿五卷蕃本詞人晚乃從朱子講學然無所成就據此故史附文苑宏簡録列道學今移入儒林

玉山縣志

卷二十二上 人物志

二十二

元

鄭元善字復初性穎悟不羣弱冠慕洛建之學慨然以古人自期待一時學者多宗師之登延祐戊午進士授德興縣丞爲政強直自遂不苟詭隨郡守歎曰儒教之見於此如是夫 前府志

明

夏浚字惟明號月川嘉靖進士授海鹽令鹽濱海浚甫至口此浙西要地也城築宜亟後倭寇變闔邑晏然浙人服其遠見遷祠部郎一時奏議出其手考八宗廟儀禮尤爲稱旨肅皇賜金帛縉紳榮之陞福建提學副使造士有聲尋轉溫處兵備時浙東海寇猖獗浚授方畧鶚渚平陽慶元金盤相繼奏捷廣右狼兵驕悍浚殲其渠魁軍中振肅擢

廣西叅政致仕居家所著有月川類草懷玉書院志博取
昭代典章倣朱子綱目勒成野史三十六卷題曰皇明大
紀前府志 祀鄉賢

吳學字原思性穎悟日記數千言涉獵經史有志濂洛關閩
之學謂聖人可學而至不慕進取鄉先生謂之曰居今非
科目無以自表見將汨沒林莽已乎勉就試補邑庠受知
於督學李崆峒曰吳生程朱之流不可量也不幸而卒所
著有正義解井田圖擬古樂府諸稿卒之日自銘其墓曰
無德可書有天不愧質之山靈山靈曰是前府志

文苑

宋

詹叔羲字仲和叔善之弟紹興進士又中博學宏詞科建炎

玉山縣志

卷二十二上

人物志

二十三

後魁是選者例當教授外州然後用叔羲以親老不能需
次丐監獄廟後復教授荆南府所著有拙齋文集二十卷
詩集五卷狂夫論六卷人物志

汪喬年字房儒紹興五年以特奏名進士對策爲第一人宗
弟端明公稱其豈弟樂易不以世俗細故芥蒂其中於人
無怨尤雖有惡聲至不較也臨事接物一以誠信未嘗逆
設機械喜賓客每斥服爲飲食費聞人之過如不聞得人
一善則稱道不容口少以文學顯晚以年德尊而未嘗自
居退然如不足者前府志

姜凱字德安登進士第苦學強記所試宏詞汪端明每稱之
後與里人鄭建德俱召試制舉前府志

徐文卿字斯遠抱道自守不求聞達葉水心序其文集云鋪

寫縱送體勢各成詩險而肆對面崖壑咫尺千里初渡江
時上饒號稱賢俊所聚如漢許下晉會稽焉風流幾泯議
論將絕斯遠與趙昌父韓仲止扶植遺緒以文達志爲後
生法

序載文獻通考

按瀛奎律髓樟邱徐文卿字斯遠玉山人嘉定四年進
士又見宋詩紀事通志選舉失載舊傳以字爲名誤也
仲止韓澆字自玉山徙居上饒南澗號澗泉斯遠與昌
父每從之遊當日遂并目徐趙爲上饒人故於斯遠則
曰上饒稱賢俊於昌父則曰上饒有二泉其實徐趙未
嘗家上饒也直齋書錄解題云肅秋詩一卷玉山徐斯
遠作趙昌父而下和者十三人紹熙辛亥也通考謂斯
遠晚第進士蓋在賦蕭秋後二十一年

玉山縣志

卷二十二上

人物志

二十四

元

王奕字伯敬號斗山宋末與子介翁隱玉琊峯結草廬讀書
文文山謝疊山歐陽野翁輩素友善疊山就執北行送之
詩曰皇天久矣垂青眼盼盼先生此一行遺表不隨諸葛
死離騷長伴屈原清兩生無補秦興廢一出仍關魯重輕
白骨青山如得所何須兒女哭清明詞旨激烈其後車書
混一遊東魯謁孔林歸始出而仕元有玉斗山集

改前志

祀鄉賢

按慶歷四年詔學者二百人以上許更置縣學然例不
除官前志云奕爲邑博宋亡棄官去非官也又何棄焉
是時縣學令統之邑之有德藝者師之耳今刪去
又按斗山雖初稱遺老終事新朝而無所怨尤亦無所

文飾視隳節偷生作倔强不屈語者有間載四庫簡明錄今列文苑興廢重輕二語自足千古

楊仲宏世居玉山億族孫也第進士任翰林編修能詩文號

百戰健兒

通志

按百戰健兒虞道國稱楊載語載浦城人延祐進士詩與虞揭齊名非玉山楊仲宏也載字仲宏諸志遂訛莫辨元詩綜無兩仲宏

又按通志選舉仲宏至治進士距南唐末三百四十餘年安得爲億族孫億無子以姪嗣世居浦城長樂里

徐觀至正進士將仕郎紹興錄事陞浦城丞有惠政性喜讀書手不釋卷所作文詞議論高古一時學者多宗師焉

府志

玉山縣志

卷二十二上 人物志

二十五

國朝

陳纁字絲言順治甲午拔貢廷試第一會朝議停選南還甲辰就太學三課皆第六大司成陳豉永學正范研經與給諫朱裴同鄉鄭日奎馮鏞皆謂纁有良史材交章論宜留修明史會染痘卒於京一時投文奠祭者多名下士

前志

吳浩字孟深號集亭性聰穎學書於梁山舟學詩於袁隨園尤喜作畫舉於鄉十上春官不第畢秋帆引爲軍前記室與子植偕授龍泉教諭葺黌宮恤貧士傲蘓湖制立學規丁內艱家居讀禮當事以品學足式固請主講端明授豐城教諭未赴任以截取知縣赴部銓卒於植靈壽典史署著紅於軒詩文集

以下新增

吳文健字壽彭錢唐籍進士有異稟九歲作夷齊論研究經

義多出心得聞蘓州段玉裁經學本戴東原往請所著以
參驗已學起難辨論玉裁竒之謂不當在弟子列阮芸臺
宮保撫浙時開謁經精舍召文健校勘采其詩文入集嘗
稱其明於小學爲一時能事語載鐘鼎欵識序任武強縣
未三月卒以廉能著有五經解義母不敬齋文集

玉山縣志卷二十二下

人物

處士

忠義義行附

孝友

處士

宋

鄭同字亦虛有行義為鄉里所服嘗舉八行科而不果上善

書有名於時襄陽米芾元章嘗有帖與亦虛云晝寢夢龍

蛇遶榻及覺乃小兒披來翰也其稱之如此隱居終身不

仕

華黼郡志

朱處士

元人辨見古蹟

居南鄉因號南山博學通經隱居教授其高

弟若徐觀之易孫自強之詩皆有名於時

續志

明

程顯中字遂良衣錦鄉人博通羣書隱居教授以信義為鄉

玉山縣志

卷二十二下

人物志

一

約推重號誠一叟子孔安剛方有勇事親盡禮而且友於

兄弟終隱不仕弟子出其門者多至顯達有題詠諸作

前

志

祝麟字應祥號靜菴善詞章隱於鄉之雲林構書舍以自娛

適不求聞達鄉黨以隱德稱學者多歸焉有靜菴集藏於

家

前府志

葉上芝號貞子博學強記避亂隱居懷玉山三十年不踐城

市日坐羣書中手自抄纂字畫精楷見者不知其為八十

老人也

全上

程瑛字桃如弱冠補弟子員古今書無所不讀下筆敏妙崇

禎末深自韜晦不肯以文辭名後進之士郎而叩之隨事

援古証今必究其根柢處深山中五十九年卒年九十七

徐一鴻字羽儀九歲善屬文爲邑令游推賞踰年補弟子員
餼於庠秋闈擬元遭忌置乙榜少貧嗜學缺載籍乃就大
家乞經史諸書涉獵一覽輒記遇有得手抄秘本自是出
入古今下筆言語妙天下初治蔡氏尙書兼通夏侯都尉
諸家言尤精易學卜筮推測咸謂得京郭異傳晚專治春
秋厭主文命題割裂頗謬於聖人常出獨見評隲左氏春
秋一卷性極孝知父憐愛少子歲取束脯備兩親綿帛外
悉與幼弟治服御自擁單衾敝絮恬如也父母先後亡合
葬黃谷山廬墓哭泣三年如一日嘗有省示諸門人曰汝
一日間有萬物一體時否又白讀書憂不明道耳毋慕富
貴富貴能福人亦能禍人其達識定性如此世力田家懷

玉山縣志

卷二十二下

人物志

二

玉中尋挈家依內兄於浙以子托焉還玉守先人墓田屢
舉不第隱鶴田村舍崇禎末土寇起倉卒以身抗賊反覆
開論脫諸父老走乃大怒罵賊死子旭齡年十五方爲諸
生上書直指張灑泣國中求父骸有德鴻者告以故處拾
全蛻歸於杭時順治二年也舅華國作負骨記

改前志

國朝

姜志學號恕菴選貢生康熙五十七年白中丞闢豫章書院
延名師教授所賞拔皆英俊次第取科甲志學好爲高古
疎宕之文居恒勵名檢同學如劉斗田裘穎孫俱目爲畏

友

厚畬初稿

姚聯字及三號坳堂邑廩生性穎敏讀書一目十行郡守陳
世璜重見玉虹橋七洞洞各嵌以二字屬聯撰書讀之迴

環成文郡守敬服敦請掌紫陽書院講席明年常中丞召
試博學鴻詞屬郡得三人聯名第二將以應

詔會丁繼母憂不果子濬庠生能讀文書病羸早世聯憂鬱
成疾卒郡守哭之慟銘其墓曰人何以生生如草茁人何
以死死如葉脫覆杯水於坳堂兮擊不能三千而去不能
六月息嗚呼春風秋月兮懷玉山前玉虹橋畔共徜徉乎

其側

續志

王以仁字元長別字似山工制舉業太守陳世增興復紫陽
書院選能文者入肄業值嘉節誕日幣帛羊酒盈門以仁
獨持空刺往及太守喪歸前時喻喻者或走匿不赴以仁
往奠有加禮乾隆六年選貢故事以身言爲去取士皆盛
衣冠習儀節以仁布衣履雜其中竟獲選

玉山縣志

卷二十二下

人物志

三

廷試高等入成均未嘗一謁貴人有欲爲之地者曰某父春
秋高不願仕也歸家養親課子弟外急於爲善如趨利十
六年江右饑玉山餓莩枕藉行路有戒心以仁念力足賑
貸無遠近日給大小三口米一升又憂男女之溷雜也分
東西厰遠者舍之病者藥之死者瘞之賴以活者計人口
二千有奇自正月至六月計米千八百有奇所出貸金不
與焉或欲請於有司以聞辭曰義所應耳敢以煩令長是
秋赴鄉試卒於道男婦來弔日數十百人弟以義視兄所
欲爲者爲之甚力兄死義益自勵初以仁年二十喪母父
欲爲取婦主家政或謂已請期不妨隨俗也以仁援公羊
喪娶之譏反覆泣陳乃止

合採續志

鄭廷鳳字鳴岐辛酉舉人故農家子貧甚好讀書父曰嘻家

啼飢枵腹誦經飽何時既以病弱足不堪荷鋤未遂縱之
學苦無書從人借抄詩文數帙讀之曰此未離黃口乳香
氣聞同舍生所讀文異是乞傳抄不許亦不復朗誦晚飯
後解衣擁被僞作嚮嚙聲俟同舍生高吟乃起徙倚戶外
一再盡識之天明書之冊他日同舍生見之曰世固有敏
且勤如斯人者乎何復秘惜爲試於學使者屢冠其曹授
徒以自活節縮購書讀之爲文日益進

魯鴻五雲館錄

朱世榮字淡將庠生讀書慕古高躅興復懷玉書院糜數千
金破家不自顧惜時湯中丞督學莅玉深爲嘉獎院中諸
生所資噐用纖悉具備復恐山佃當青黃不接時借貸無
門建立義倉以舒其困日徒行崎嶇間百餘里十餘年間
心力畢瘁是大有造於懷玉者

續志

玉山縣志

卷二十二下

人物志

四

童良居懷玉山麓樂善不倦稱清時碩望子孫祠之康熙中
知縣沈景韓題其楹云孝友力田秉周官之法度詩書執
禮守孔聖之雅言至今其裔猶有義風懷玉山長徃來郎
其祠館焉

以下新增

徐兆鱗字發剛一字敬齋唐徐叔倫之後選貢大司成孫錫
公修春秋講義大學講義與分校焉旋充教習知甘肅成
縣假歸杜門不出太守秦勇均聞兆鱗賢因公莅玉以詢
令令對不知訪之居人乃得之縣署前矮屋中大守造焉
劇談竟日從者忍枵腹跛倚立太守自忘飢也禮聘主講
紫陽書院人兩賢之子之潮孫人杰皆有兆鱗風 之潮
字慶安一字渤菴恩貢生就直隸州州判職性爽直取與
不苟莫干以私鄉里爭訟得一言卽解及老病戚友來視

猶以立心行己相勗疾革人杰泣請訓曰彊爲善遂沒人杰字景元一字芝山髫齡試輒冠軍數奇不遇乃棄舉業母病湯藥必親調饋及卒弟尚襁褓待哺力不能乳代以羹餌雖中夜必屢起及成人婚配其愛護之勤慮深於在襁褓時也家居對書啜茗待月澆花聞戶外剝啄聲則摳衣走避罕得見八十翁者時人爲之潮語曰矮屋深如海寒儒重若山如人杰者亦能不愧矮屋矣

程學灝字勝州號厚齋性剛介讀書必求精義舉於鄉授峽江教諭進諸生講四子書環聽者罔弗心折秩滿送部引見致歸與弟學涵立族學建義倉而祠規尤整飭男婦禮教肅然祭之日無敢後至者丁明府嚴正見學灝曰吾之徐孺子也旣興復端明書院郎聘爲山長多所成就學灝

玉山縣志

卷二十二下

人物志

五

病親徃視及卒輓之曰身後有人題墓道座間何處覓春風

鄭起觀字達夫一字瀾泉以副貢就教諭職有司重其學行延主講端明十餘年未嘗干公事惟與諸生以制舉相切劘楊霽菴進士王介亭吳月川陳寶齡李廷琳四孝廉並出其門

鄭圖南字峻飛優貢生性孝友天資敏絕長受業於仁和趙鹿泉之門卒業而歸有夷然不屑之意然循禮蹈義毫髮不苟其論文不拘奇平濃淡惟其是訓二子皆成名邑之茂才異等多出其門所著有四書口義隨筆雜錄諸書

尹文純字賓陽一字穆菴幼能文年十六補弟子員以明經貢禮部授徒歲入修脯敬奉甘旨父久嬰疾辭館親視湯

藥歷三載如日常訓諸弟子曰讀書非爲功名起見宜志聖賢之志學聖賢之學立品安命吾儒一生著脚楊大中字克基一字和亭恩貢生苦志力學訓蒙日課畢夜分猶挑燈自讀入庠食餼屢薦不售無幾微悵惘見於顏面及貢後不復進取家居教授多所成就性謙和與物無忤凡所趨舍截然不出禮度之外族故有義倉大中維持之春散秋斂井井有條

董履謙字鳴六一字東浦謹言慎行爲諸生時名噪甚知縣張延教諸子論詩文外毫無干及張重之後令萍鄉邀偕往還任聘主講懷玉屢舉鄉飲以明經終其造就人才如徐孝廉旣行及張公子海瀾陳壻正頤二人並成進士

李必泰字象中一字草庭幼穎敏咏菊云知己可能逢漢魏

玉山縣志

卷二十二下

人物志

六

閒情直欲傲羲皇浙中馮藕船先生見而歎曰此生格固不凡但恐遇慳耳隨父仲良任粵歸以例貢應錄科試時學憲謝以其中二字命題策問周官九拜儀若何蓋難之也閱必泰卷驚異錄第一秋闈報罷旋患心疾平居言動不苟遇人一以誠敬著對竹山房草二卷今散佚有詩刻平南志中

詹曰莊字則敬一字愚齋早失怙弟曰密甫七歲曰莊事孀年祖母及孀母並得歡心習舉業食餼郡庠兼督諸子弟姪學每日暮必採珍味歸佐甘旨承色笑候寢息方就館弟長家務必商之明侍郎燕峯公瑩墓御史寒泉公祠宇圯壞俱出重貲修建又念宋知止公書院故址奉給本嗣起造今祠就圯病革囑曰必建是方瞑目焉蓋欲以綿祖

澤而培書脈也子體溫補邑庠有父風體良膺歲薦三舉鄉飲恭儉並業儒納監孫輩多列庠序嘉慶間四子郎舊址倡造祠宇成曰莊志邑令應曙霞以祖武永繩匾獎陳宗字濂亭性恬泊棄舉業讀書自娛築別業十二尖下家雖貧圖史充斥手植槿以餉客子四客至伯仲周旋宗與客談經問字而飲饌立具庖俎無聲身後一鄉稱任卹而莫知宗門內之樂也漢中守鄧箕山來玉講學孫聲鉅從游始爲表其墓

按淵明辭彭澤令爲晉處士元朱處士南山豈其流亞歟何以并名字而隱之也然而趣舍異尙固有躬際聖明各引分自安者豈必矜言高蹈哉第使行己無虧雖功名不遇或遇矣而仍未顯皆謂之處士詩云在彼空

玉山縣志

卷二十二下

人物志

七

谷其人如玉固將賦白駒以贈

忠義

宋

葉大用紹聖間任武職金人侵汴大用酣戰陷陣全軀以歸高宗親書拔身歸國節義可尙八字賜之隆興初援西京路兵馬副都監

明一統志 祀忠義

明

詹軾字敬之由進士授行人正德己卯上將南巡軾伏闕抗疏尼大駕行因下獄撻諸朝而死世廟嗣位遣官諭祭贈及其父御史廕其于人監

採一統志 祀鄉賢忠義二祠

汪蘭字子芳宋汪應辰後由歲貢授開化訓導致仕居家以節義自勵嘉靖辛酉廣兵袁三從浙駐玉蘭窺其將作亂

往諭之曰若等爲此意豈不有所欲乎顧旦暮且擒及茲
遂戢可轉禍爲福也賊已嘯聚勢不可已迫之行蘭正色
曰死卽死耳吾豈從反乎罵不絕口被殺郡理姚公上其
事於都憲胡公署其間曰侃侃正氣合府縣志 祀鄉賢
忠義二祠

舒萬化字廷風由歲貢任彬州訓導奉檄撫永興桂陽桂東
民變再監援兵往治臨藍二邑俱有功例遷龍泉教諭會
直指邢廉知萬化才以萬安七生大辟付訊平反之直指
閱讞辭曰異才也忍以廣文屈耶卽會撫軍交章薦擢青
州博興令出難生王掄於獄豁一孝子冤壬午夏武定亂
民萬餘逼城下嚴守得全其冬卒遇變不屈死妻程氏幼
子懋友媳毛氏同日死前府志 祀忠義

玉山縣志

卷二十二下

人物志

八

舒懷字克寬別號仰泉長史彥章之曾孫貢士幼穎敏以奇
童稱正德壬申姚源寇起猖獗莫制兵備胡世守奉命討
賊旁求參輔邑令以懷應德興以邑諸生程杞應時懷廬
墓堅不肯出胡諭曰移孝於忠夫孰非孝與語連晝夜大
悅遂令督諸路兵而以杞貳之設奇畫策絕嚴村之糧拔
武山之壘寇平邑賴以安總制俞諫嘉其忠勤咨送成均
肄業杞從請懷辭不就於是上官遣郡訓陳君謨獎之有
才堪克拓策可濟時仗義督兵雖死不惜之語無何疾篤
竟卒而杞官廣南府經歷嘉靖中撫按學使檄藩臬修墓
建坊曰褒揚忠義家藏有忠義集全上 祀忠義

國朝

顏天相字子品一字燮亭由選貢充四庫館謄錄議叙直隸

州州判分發黔省黔故邊地州判缺頗少嘉慶己未假署
安南典史時值苗匪滋事羽檄交馳辦理軍需無暇晷積
勞成病猶力疾辦事遇瘴發死事

聞

贈按察司經歷給銀葬祭廕其子祿卿主簿

新增

義行附

明

李冬佑樂善好施天順二年因建預備倉上穀千石助賑奉

勅旌獎立碑於門陳仲華正統七年亦上粟五百石助賑

奉勅旌獎如冬佑

府志

鄭大階鄭可遠俱威愍後裔階父素憐愛幼子光陞與同里

舒廷風交善階延廷風興弟同筆硯書籍館餼一切供給

玉山縣志

卷二十二下 人物志

九

凡數年後弟補博士弟子而廷風由學博擢博興令登堂
拜父執階手謝曰今日皆君賜也敢不拜族凡可達弟可
遠俱施義賑族階實倡之儀部鄭鶴暘定陽程帝錫贈序
貽祠堂表其事客有徐如德遺腰纏道上階拾之啟視有
金籀七具券約十餘紙階候郵亭竟日徐至悉還之徐有
女選華山王妃具以前事白王王召階至敬禮之薦授典
儀所典禮可遠自少時亦以孝聞萬歷庚子歲薦凶釜米
萬錢遠倡義捐穀存活甚衆知縣游鳳翔詳府表其廬玉
俗尙聲歌綺縠遠獨砥儉慤家賴以興然赴公周急身先
四民雖費萬緡不恡也諸如葺城修學治道路建橋梁創
置祠堂義田凡族之子弟失學與婚葬之乏絕者皆給助
之崇禎九年御史徐養心檄通判徐日高給冠帶榮其身

國朝

王濂字遵五一字曲塘邑諸生篤學好義凡遇公事毅然有爲玉學舊學八名雍正三年濂與王應煥等連名具呈請廣邑令楊申詳題復舊額十二名學舊有田百餘畝久荒蕪侵沒濂請於邑令張清復而張令復新置田若干畝他如修建書院造橋等公舉濂不辭勞各有碑記

以下續志

鄭士牲貢生兩倡建東津橋歲饑平糶府經歷董志宏道路橋梁修建不吝多金廩生魏永清字聖淑衆所信服郡守陳建玉虹橋創試院俱委重焉舉鄉飲介賓

俞敬德字漢臣居家輯睦遇尊輩歛然自斂抑至族黨有紛爭者敬德排解之無不允服嘗儲皮油萬斤牙儉某領朱

玉山縣志

卷二十二下

人物志

十

商某求售議價六百餘金人直過半忽隣家不戒於火延燒一空詰旦客同牙儉馳視吞聲飲泣敬德出原銀并券還之客喜出望外謝去其他如倡建高橋碧峯等橋皆饒徽要津乾隆十年舉鄉飲賓衆謂不愧

湯其舒捐白金千兩倡造古城石橋改名永濟橋監生陳嵩捐造十里山渡船並田二十畝贍之南門外大王山下河畔一帶內貼石脚外臨深潭多失足墮水者嵩置紅石爲欄高三尺長三百餘丈閩浙過客始免顛躓魏敬賢於古山地方建石橋一座名古峯橋費三百餘金陳元華出貲二百餘金助建文成塔賑粟施棉艷於爲義

葉士標字瑞五國學生乾隆十六年饑斗米錢三百六十文六嶺內有終自不舉火者因思家止有穀千餘石碾米減

價每斗取錢百六十文并勸近地殷實戶量力平糶雖有應者亦難爲繼通計月餘不足接濟時各處價昂遏糶米船不通因赴前太守秦具呈給照買米數百石運至仍減價如前念貧民無錢商建雙溪石橋令人以力易米諸佃人並給還佈錢令資種作并不加租六嶺內賴以存活不廢業者甚衆又嶺內荒山荒地古塚不下千餘年久缺醮祭爲買石千餘塊各刻古墓二字誌之以防日後開荒誤掘

翁德桂字清遠監生待族鄰有恩義好讀軒岐書選良方揀藥料配合丸散有求者必應雖昏夜叩門不少稽也程應瑞年荒施粟歲疫施棺皆好行其德

李宏三年七歲失怙依舅氏吳就學比長成家置祭田分爨

玉山縣志

卷二十二下

人物志

十一

讓產朱登彥童時父母繼歿兄弟俱幼相依爲命後年七十以子姪衆多析產推肥取瘠畱祭田族黨稱之

劉宣猷字爾嘉廩生少失怙事叔父如父及冠補弟子員食餼倡修先賢祠及義學郡伯陳提學金咸匾獎之

劉世憲字章周邑庠生性英敏嗜學事母孝取予一介必嚴爲鄉里所矜式從之遊者多所成就尤樂爲善事十七都竹溪橋屢捐修不輟

董選字建侯有學行嘗主講懷玉生平每思敬宗收族廣行陰隲而恨力之未逮也以歲貢授金谿教諭未赴任卒子延祐延禮克成其志延祐字原姬亦歲貢倡建宗祠延禮庠生與李日初倡建平洋渡三洞石橋族人謂建侯於是

有後

童其勅字帝雲附貢生觀察李□雲興復懷玉書院學者曰
盛師生往來山中皆主其家飲饌精潔僕從醉館咸稱曰
賢生入山長張彌年老米糲食少進爲搆水碓於山中朱
世榮屬料理師生器用纖悉曲備入山者如歸其家
符學棟原籍宜黃隨父昌掄來玉年十一歲偶行十里山右
西濟橋東岸橋木朽壞將傾裸衣涉水時天寒水急幾至
淹溺誓有力必成此橋經營十數年度可舉工呈縣改造
石橋乾隆二十二年秋經始二十七年春葺事督撫合詞
具題部覆實准銷銀萬一千三百三十四兩有奇照山西
樂輸例議叙以州判卽用選授狄道州州判分駐沙泥站
莅任有賑粥施棉諸善政三十一年所轄二十八庄被冰
雹詳請賑濟得

玉山縣志

卷二十二下

人物志

十二

俞允以年老乞休

符中立邑建東津橋大工難竣中立獨捐三百金不足邀吳
文仲各捐九百七十兩有奇又不足復捐三百五十金成
之楊知茂建十二都仁壽橋四墩五甕費千有餘金後圯
家已中落鬻產鳩工時年九十有一瀕卒戒其子曰停柩
橋畔勒限督修必橋成乃葬子卒成之其他善行尙夥舉
鄉飲賓

鄒大賓字晉初明諸生鼎革初盜賊未靖津梁不修晉初偶
適所親涉水賊劫少婦至令負婦涉不許將刃之不得已
負以涉歸曰我豈爲賊負婦者乎遂閉戶反覆誦關雖數
語且誦且泣泣罷自經

以下新增

蕭垂豈宇恒佐一字通寶前明忠烈公漢從曾孫也祖名任

南豐名諸生父挺生有隱操垂豈生而家益貧親殿遷居
玉山遇遺橐中有銀錠二布券一坐道旁俟其人還之妻
父傅子龍夫婦年老無子垂豈迎養於家葬祭如禮屬子
孫世祀勿替其忠厚數如此子三樹人早卒 樹猷字有
榮一字遠亭有至性與弟竭力營奉甘旨卒以成家喜施
與倡義緣社建慶豐亭焚券之無力償者不下千金忠烈
公無私產樹猷不忍其傳三世絕嗣也使長子溥智嗣樹
人以承忠烈公之祧世族中尤高其義溥智例貢生翁覃
溪匾獎之曰世傳孝友 樹勳字均饒一字豐亭魁梧美
鬚髯倜儻軒豁性至孝生事塋祭必竭其情嘗貿易蘓州
大遭折閱歸父問之不敢以告恐不安其奉之豐也父兄
繼沒念劬勞之莫報迺捐職州同以榮贈其親撫諸孤成

玉山縣志

卷二十二下

人物志

十三

立四世猶同爨其恤親朋扶危困歷歷在人耳目邑中諸
善舉不惜重貲襄事先師孔子廟之遷亦樹勳以千金倡
其議也而精力尤殫於東津橋橋成十餘年不入縣署愛
讀陳榕門訓俗遺規且印裝數百部分送長子兼瑩以進
士官吏部郎中餘見封贈

吳有富字可求例貢生族里稱貸貧不責償歲稍歉卽減價
糶艱於婚葬者屢以金助乾隆辛未大饑傾倉賑恤不繼
復給錢以濟水衝鎮川石橋有富倡募修造又置田十餘
畝培宗祠嘗舉族正知縣李公世基給修善慕義匾獎

陳良棟字宇峻例貢生乾隆辛未甲辰嘉慶壬戌歲饑皆減
價平糶月餘建東津橋倡捐不懈又先後其捐田十二畝
有奇爲三港橋修造費端明書院之建捐金外口田十五

畝零資肄業膏火

李步字雲衢捐縣丞職五世同居嘗失火步呼天曰願獨焚吾舍勿殃及居鄰也郡南建諸溪石橋步獨造一洞生平設渡濟人施棺瘞骨又倡立康衢社

詹時芳字帝舉邑庠生無兄弟代理家務援例納監睦族恤鄰喜行善事周家塢嶺路崎嶇砌以石級寒泉橋頭路通江浙鋪以青石乾隆戊午捐助玉虹橋邑令李公泰來以材濟巨川匾獎子兆高監生有父風兆龍兆陽並武庠

顏國采字英建附監生好任恤族鄰告急無不解囊立應精醫學製丸散濟人不受值縣建玉虹橋捐金三百爲郡守陳所嘉與贈以敦本利人匾額子文耀善承父志乾隆辛未大饑傾倉谷三百餘石減價平糶煮粥以食老弱全活

玉山縣志

卷二十二下

人物志

十四

無數年八十一無疾終

顏光勳字英發附監生性慷慨所識窮乏有告貸輒周濟之恤鰥寡耆艾尤厚雖橐金告盡不少惜都內有橫槎渡通縣治江浙要津也舊設木橋值春水暴漲輒傾壞勳倡建甕橋五洞覆屋其上募緣無幾悉佐以己貲橋成邑令李高其義親視錫名高橋後圯於水子孫不欲沒其蹟仍設木橋置渡船撥證果寺田建餘慶菴於橋側令僧以所入租修理橋渡

董德超字拔千一字野塘邑庠生黃坂古壩漑田數十傾通城郭內外乾隆甲子洪水壩址盡圯布以竹木填以土每易潰灌蔭多艱壬寅超倡集六村人等呈縣另立壩址委丞諸勘給示照號畝出貲鳩工甃石董建新壩百餘丈口

年始蕝事戊申水尤甚賴址固損十之一超年逾七旬炎暑不避合六村勤力補苴綢繆鞏固負郭者雖旱不災王應煥武庠舉鄉飲乾隆己巳造中於喜承橋一洞楊光亮善岐黃不索謝雍正庚戌造汪清橋乾隆己卯造湖尾橋共費百金又捐建福濟菴舉鄉飲壽九十五歲毛元璧王汲並監生乾隆乙卯元璧修皇勅塢石路數里汲修張里石路五里俱北鄉入城孔道

吳士勳字光猷監生性倜儻勇於趨義遇道路津梁傾圯不憚捐橐倡修嘗從新安曹含英學岐黃術所治多奇驗廣製丸散施舍不倦有與以值者士勳曰吾以濟人爾豈計利者哉悉却不受嘉慶壬戌歲大饑其地山多田少遠近無可告糴幾絕爨烟士勳倡捐千金赴浙之長安鎮趕運

玉山縣志

卷二十二下

人物志

十五

米石減價平糴多賴全活年八十餘親見五世子孫讀書俱成名

王應元字子善監生少失怙讀書日誦千言祖母憫其孤弱不令卒業比長佐兄理家政所規畫多致贏餘而性好周恤乾隆癸丑八礫水發冲壞古埕及田廬人多淹斃時青黃不接念家無餘穀卽倡修古埕百餘丈俾傭力得錢外糴多所全活嘉慶壬戌饑又往浙運米減價平糴年六十七喪母猶晨夕悲號服闋卒邑令陸輓以聯句稱任恤焉廖振榮監生乾隆間修崗背嶺青石路一千餘丈助養濟院田貳畝陸分又建萬壽橋并捐田貳畝貳分以贍修理賴汝謀字其哲監生好施父應馨修下步嶺路數里建磚亭汝謀成父志屢加完葺又於衆水合流處倡建杏花橋他

多數是卒之日邱給事日榮誅之曰一鄉善士

王起湖字聚川年八十以從九職舉鄉飲遇族鄰有恩義活人以岐軒術有宜服重價藥而力不能者不惜爲致之買山以待葬無後者皆識以石而祭之於日至塚纍纍不下數百也父萬鈺建南嶺五里亭又建儒溪石橋墩起湖重修倡置南溪渡以待漲其卒也盡焚券之未償者計千七百金

王允欽字敬彰一字慤菴以從九職舉鄉飲居城市不履公庭凡遇公事屬弟允聰襄成之雖屢墊錢緡不吝里有以窘迫告者各得其願而去舊儒學後墻外一帶路逼湖岸崩塌不堪行獨輸囊累石平坦計數十丈邑令應曙霞以詩獎其尙義

玉山縣志

卷二十二下

人物志

十六

童應斗字北辰康熙辛亥旱蝻隻身赴省告災撫憲董爲題疏蠲賑減徵是年麥食盡應斗預蓄麥種以散給種者邑令唐匾獎焉嘗造亭懷玉山麓路旣改亭不當路又遷其亭時有歸寧而還路旁遺金者問之則應斗妻□子五其進其遷並有聲庠序

童大驛義士其謨子好施棺木治橋路尤以救荒爲急乾隆甲辰己酉甲寅及嘉慶壬戌穀價皆昂貴未嘗不減之以糶蓋有父其謨風

童之理字道甫喪不能斂者則棺之寒不能襖者則棉之沙溪嶺盤紆十餘里行者苦渴建青雲寺施茶祝司之而置田爲久遠計遇歲荒身爲之倡几童氏有穀之家一體酌損其價以糶故他處有飢民童家坊不食貴穀

蔣有祿每歲饑平糶自乾隆辛未後三次減價救荒邑令吳士淳匾獎子仕瑛仕璜皆能成其志瑛字子亮貢生好恤災眚施棺木廿七都中峽路崎嶇往來苦之屢倡翰修治乾隆癸丑山水衝壞過半瑛獨力爲之雖浩費無難色臨終以繼事屬子應魁應煊嘉慶甲戌又壞於水路之修治無殊瑛在時璜監生喜多錄方書以岐黃術濟人邀視病不計貧富必往力不能致藥者助之其平糶減價則兄弟同以爲家法

林文波字光澤少有才略遭伯兄亾率二弟竭力事親漁水獵山甘旨無少缺及長善排解族戚有忿爭輒備酒食邀至家異言曲諭并代出貲以息其事雖數十年積怨無不和睦如初社會積穀備報賽適文波值年前歲穀已盡售

玉山縣志

卷二十二下

人物志

十七

置社產有必領穀者卽給已穀以全其會晚尤不倦歲饑令舉家食粥以所餘濟親鄰囑子士炳檢閱質券力不能償者悉焚之士炳補弟子員

周驥篤宗族厚姻戚鄰有舒姓者貧不能娶助之貲遇暑則施茶以待渴乾隆癸卯街衢溝道障塞雨集則溢入肆舖獨力疏濬自朝京坊至化龍橋又挑平梅魁埂積土以培坟墓事稱兩善

俞進賓乾隆丙子歲饑獨運穀五百石減其價糶焉得甦一方之困以州同職舉鄉飲人咸曰此陳太守所稱以義率人者也先是太守建鍾靈橋進賓倡助橋工云

顧文質歲歉減價平糶長子明侯有盜鬻其田與人營葬者旣葬遂不與校又鄰村某葬坟於山以其田爲拜壇子弟

欲阻之侯不聽具酒食往且謂其人曰僅一拜壇需田幾何胡不擴而大之其人慚謝餘子亦皆好施

張可洪喜修路年九十七猶能躬荷鋤雜諸孫畚揭間造施茶亭於廿九都出其路者無病渴

鄭之煥乾隆辛未大饑煥發粟賑濟存活無數有貧病而不能殮者施以棺木

陳際聰樂善好施乾隆辛未大饑家僅餘穀十石散給鄉里並不索值事親以孝聞

過允璣慷慨好施嘉慶壬戌荒旱減價平糶濟貧乏捨棺木孝友

宋

徐軻字子車與兄輔同登進士第兄弟孝友鄉人推敬東坡

玉山縣志

卷二十二下

人物志

十八

在黃嘗有帖與質夫提刑稱其爲佳士詳見雜志

前府志

祀孝弟

明

李亮字公信性至孝由鄉薦授懷安令考最陞廣州府判以親老懇疏致仕惠政翔洽兩地尸祝之歸養時年已及艾而承歡膝下輒嘻嘻有孺稚之態里中相謂曰不圖今日復見老萊衣也居喪毀瘠骨立先是亮父尹初樂施邑南有溪水人方病之尹初募築玉虹橋橋成而亮生子玘登

進士爲清白吏嘉靖癸未祀鄉賢

節前志

並祀孝弟

葉忠字廷直由鄉薦授山東樂安教諭造士多方一時稱盛詳載樂安縣志陞太平府教授致政家居篤於孝友歷官俸資俱與弟信均之所著有靜軒集忠樂安祀名宦嘉靖

間祀鄉賢

前府志

並祀孝弟

詹泮字文化申進士改翰林庶吉士授禮科給事中甫六日訛傳母李病篤遂懇疏終養會大父卒哀毀廬墓產五色芝咸以謂孝思所感語在芝亭集中家居菽水承歡二十餘年交薦不起迨母李病篤昕夕憂皇形神俱瘁遂先母卒有少華遺稿隆慶庚午祀鄉賢

全上

並祀孝弟

舒哲字天貽家貧事母至孝鄉先生爲作怡萱集母病不解衣者三月由歲貢授會稽訓導躬行率士品藻尤精歿於官諸士咸痛悼之櫬歸多造廬而哭緒山錢公謂其生則盡人之倫死則致人之哀可謂無忝所生者嘉靖中督學可泉蔡公檄祀鄉賢子璘事哲亦孝縣令扁其門曰世孝之家

全上

祀鄉賢孝弟二祠

玉山縣志

卷二十二下

人物志

十九

劉永孫母病篤家貧無醫藥資割肉以活母者數而秘不令母知有人視其刀瘢斑斑然爲之泣下萬歷三十八年邑令婁申兩院會旌之

全上

祀孝弟

周鳳翔貧甚竭力晨昏盡養無缺父母病劇叩頭流血祈天請代屢荷奇應天啟三年事聞兩院給匾旌獎

全上

祀

孝弟

鄭一性母病家貧延醫久不愈籲以身代一夕焚香祝天割股和羹以進一啜而瘥此天啟六年事也至崇禎五年邑令王之禎獎旌其孝

全上

祀孝弟

國朝

詹翊謀字次羽選貢耿逆之變父廩生冠已故奉庶祖母偕母避亂山中崎嶇艱苦孝養備至獲選

□高等當肄業成均以母老告歸邑令沈聘主懷玉書院
成就甚衆續志

汪廣文定公後性至孝事母陳竭盡孝養事事得其歡心母
沒廬墓三年藜羹芒履晨夕悲號聞者隕涕邑令甄表其
廬曰純孝性成前府志

尹宗芳字桂倫力田養親日食蔬飲水而父母有歡愉色兄
與嫂早世姪未及週乳哺如己子尹氏故無公產芳首捐
穀命子經綸經濟與族人同心經理其後得以建祠置田
皆其力也祖山歲久遺契券盜砍墓木弗能禁芳出金勸
止之無復再盜者經綸字求聖太學生祇聞庭訓醇厚謙
和族黨敬愛一夕侍父側父忽掩袂而泣經綸惶恐謝罪
父曰子無過吾向事爾祖似能竭誠今爾事我乃過之吾

玉山縣志

卷二十二下

人物志

二十

自反多遺憾是以泣耳經濟庠生有幹材與兄協力拓祀
產以成父志瀕卒呼諸子曰士君子當以利濟爲心也檢
笥中數十券焚之合採續志

潘惇字莊埜祖父俱有學術惇少籍諸生事母至孝母性嗜
茶從友人所得佳茗必手烹以進又好音律惇從吳山人
敬臣學琴母中夜不寐輒起焚香鼓琴一再行母年七十
餘惇亦已六十矣啼笑如孺子容教讀必與家隣近他方
富室聞名爭延致之謝弗往續志

王大受歲貢生以學行膺懷玉書院山辰成就甚衆所得館
穀分給諸弟家無餘蓄同上

喻開一字時菴性肫摯年十齡失恃悲號哀慕水漿不入口
二日事繼母同於所生疾病醫藥必先嘗侍養弗離鄉舉

後詩書自娛足跡未嘗履城市以品行式鄉里

以下新增

李日曜字葆光一字佐巖幼失怙事叔父如父所得館穀必以佐甘旨待叔父之子甚厚出入與俱飢寒與共里中薄行兒爲之心動其爲文根柢性情趙鹿泉主講懷玉一見卽期以遠大鄉舉後授萬年訓導率諸生以敦本行爲先年七十告歸讀書天馬山以文進謁者卒未嘗見其輕言笑子瞽女芝姑性貞孝先日曜卒

王樹藩字屏宇一字介亭生而乳四髻齡應試舉業已爲鄉先輩所推年十五不一月而怙恃俱失哀毀過於成人繼祖母周性潔恒茹素菜羹必手進雖孤子當室無不廩命而行周旣歿乃與弟樹葵共肆力古文辭鄉薦北上歸閉戶授徒講治經義外舉古孝友爲子弟法傷劬勞之莫報

玉山縣志

卷二十二下

人物志

二十一

偶有感觸未嘗不涕泣下也憂鬱成疾卒有北遊草

梁昇萬字兆龍其先南豐人生而淳樸言呐然如不山口耕暇從村師問字輒通大義兄弟叔姪析爨後有急必與雖儉約有酒肉必奉親不問此日爲誰供膳也娶蕭氏生子三世恒世祿並服賈世德力田俱勤儉起家易簣時屬子孫曰梁氏族本寒微叔祖質人以布衣名動公卿著懷葛堂集傳世吾祖僑居玉山烏沙嶺吾父因之今欲歸省墳墓建家祠修宗譜置祀田非數千金不可而力有未逮生平所耿耿於中而不能釋然者爾小子敬識斯言時孫以勝在側年甫十三猶能切記之後三十年間家計日益饒凡義緣堂浮橋道路諸義舉世祿樂輸襄事世祿歿適南豐族人來商譜事以勝兄弟念父與叔父久欲爲此遂欣

然往卒成昇萬志餘見封贈

李興賢父朝乾子六人興賢最幼早失怙母嘗攜之過株樹下興賢拾其實啖之母曰汝知吾侍汝祖母時非啖此無以度日乎興賢爲泣下及長承命貿易有所入必歸母不私自諸兄析爨後興賢家漸裕捐己分田六十畝爲祀產又置學田以勸族每念前人艱苦起家乃援例以州同職得貲贈以云報也

吳文祥字明試附貢生有至性與弟文蔚同敦孝友父士登以蔚出嗣故置側室於杭又生子三祥在家事母楊氏孝歲必往杭省父杭故尙侈父性好結納費用無定數祥悉備以需未嘗有缺於應祥每省父必屬蔚兼視母祥歸則蔚必請代省兩人往返無間者三十年士登歿祥以哀毀

玉山縣志

卷二十二下

人物志

二十二

成疾尋卒子俱幼蔚恐母憂祥念切爲祥經紀喪葬及家用務勗弟姪以學幼弟天慶姿較敏蔚期之尤厚嘗於屋外池邊構一樓旁皆植竹命天慶與己子瑛教讀其間每風和日妍扶母憇竹林坐石欄上聽諸孫書聲琅琅以娛其志後瑛登鄉薦楊氏猶及見之天慶旋捷浙闈諸孫列於庠者十餘人粵東徐延翰爲繪漁經樓課讀圖而繫以詩

童大績字舜嘉郡庠生母蚤世父誓不再娶大績私竊金爲父娶繼母生弟四迄今子姓繁衍皆稱道大績勿衰

吳泮邑庠生父患足疾出則負以出入則負以入手浣溷溺器三十餘年不假諸人母病日舐以舌不效坐卧衣履皆泮扶持解納終母之身忘其爲瞽也居喪盡禮三年不入

內室年逾七十猶不忘哀慕

林仲舉字興周少讀書有兼人姿弱冠補弟子員旋因族與黃姓忿鬪致釀命案仲舉父爲家長被逮將下獄仲舉思脫父罪毅然以正犯自首縣主甄憐其文弱欲釋之多方詰諭仲舉供益堅乃定讞旣繫獄父念獄內囂隘搆牢屋三間朝夕諷詠者忘其身爲纍囚者以獄尙有解免路得不死流陝西赦回父已歿展墓悲號欲絕

詹曰昌監生年十三與兄析爨兄遭洪水家產蕩盡二子飄零昌迎兄至家父事之兄歿喪葬盡禮戶部湯藩與昌厚善於其卒也撰文表其墓

賴汝濱從九七歲失怙母患風癱暑則負就陰涼寒則負就暄曝至卒踊躅哀號絕而復蘓者再遇忌日必親拜墓依

玉山縣志

卷二十二下

人物志

二十三

依不忍卽歸年七十卒勤儉成家推多潤寡族戚每賴以濟

吳士發字光超敦朝之子發居長次士登士仰士哲士勲士沛士昱昱生而敦朝歿發兄弟哀毀盡禮事祖母與母尤謹念治家非勤莫濟命登沛整理山田仰哲貿易姑蘓而已親課勲昱以學仰哲早世發撫嗣孤如己子時登沛手植成材發棄書偕登售木武林居焉所得貲寄歸奉母屬勲昱攝其總有餘推恩族隣內外無私積有負發千餘金者度難償伺發歿謀捏非事誣抵登置不校其人卒感而化登年老委家事於勲昱食指踰千雍睦無間以居宅迫窄故異爨出入度支仍歸昱遇事子姪齊集昱室聽處分昱亦溫言相諭無厲色初發居杭與勞宗發吳鴻契好嘗

得其講解錄歸教子姪昱承其志日偕勲詣館督課雖姪輩登科第猶諄勗後進不倦家法讀書不千公事不聽招搖不趨游蕩凡聲色狗馬樗蒲之戲從不入其門

吳文炳字明丹天性純篤幼與弟文瑤同學俱聰敏比長遭兄亾出理家政時父多居杭置側室馬氏又生三弟炳依隨母側備得歡心摒擋兩處家用雖劇煩百無一失文甚委任之父歿哀毀成禮服闋勸瑤就試瑤入泮後以赴鄉試歿於省炳傷悼靡已念庶母暨兄嫂弟婦俱孀守以長子嗣兄後撫諸弟姪恩誼有加五弟文健爲錢塘名諸生炳渴望其成飲食衣服悉從豐不爲制及健登第炳已早卒教督炳子一如炳在日

吳文廉字明辨八歲失怙悲慟絕粒祖母陳諭以母方待養何自戕爲始勉進湯粥事孀母事無大小悉請以行出必按期返居常憶及父輒涔涔淚下及母至則神色爲之頓舒母嘗患心疾思珍果百計購求獲然後已母歿哭無常聲哀慕如兒時遇祭日必指母素嗜某蔬某食命家人善治以進又以父在日厪念永春祖墳缺祀田適祖籍人來修譜卽捐金三百置產以贍其祀弟文儀亦善承兄意每食兄口至不先下箸雖白首相隨不離

蔡世鏌父士琳出靈湖姜氏世鏌自傷舉業未售見繼母生弟世鉞幼慧心獨熹晨夕督課偶扶弟母憐穉弱微不悅世鏌必婉解色霽乃已攜弟應學使試榜發已落而弟雋急走報仆折其齒及歸妻以幼子殤告戒勿哭整衣冠爲父母賀曰姜氏當有耀自他矣先弟登賢書一年卒以未

及見爲恨

徐良玉字琢成性孝友躬耕養志父疾侍湯藥無間及篤籲
天身代喪葬盡禮與妻吳事孀母尤謹兄產業盡迎歸養
葬弟瞽命長子舐之目得復明

姚國相字志綸一字拙菴隨兄館學童試屢冠軍兄歿父母
多病竭力左右不假妻兒因母偶失足益不敢一日離也
從弟幼失怙恃攜歸視若同胞訓習授室延師獨具膳邀
戚友子弟與兒輩相切劘工書法所居室日繕格言盈案
舒學博過之曰是亦爲政矣遂以榜其室嘗爲父瑩兆數
尺得古甃亟封之或曰無主何害曰山歸我我卽其主耳
自是醮祭無失平居製藥拯病施棺掩骼無德色知縣李
大謨嘉其行書孝友垂聲以贈議舉孝廉方正科命二子

玉山縣志

卷二十二下

人物志

二十五

玉輝殿輝固辭乃止

董時福字膺五一字景亭善體親心有必請所與之意事諸
兄克盡弟道與人無粉飾戚族爭訟爲力解卽陰有所費
不令知教子義方知縣黔阡張公稱其古處猶敦

王長發幼失姑赤貧弟先出繼獨養寡母苦滫瀡不給勉服
賈者數年旋念母年老不復出朝夕視膳母子甚慰也母
忽患疽視湯藥夜不安席亟起吮之經年以瘳弟後生計
窘撫姪如己子俾克成家

王嘉端性至孝年十九時母李氏病劇垂危端齋沐三日後
每夜人靜跪祝家堂嬪黃氏從門隙闕得其實將適澗與
其母揖別曰爾有三子惟端最孝母問故乃具道始末母
病卒端哀毀骨立喪葬盡禮

姜天福父患牙疽毒氣壅潰穴眼眶而出醫藥已徧不能收口福每夜攜香楮私禱於龍泉社父稍瘥然事秘不令人知其孀嫂猶能歷時竊爲人言之

江佑字天申幼失怙弟天錫六歲天授纔六月家貧藉營生以養母及兩弟比長家稍康曲體母意先爲兩弟娶而後及己天錫病故妻李孀守慮外家之奪其志也每私贍外家以完婦節天申倡捐康衢會及文昌閣多義行

程希文幼失怙惟母氏是依抑搔扶持不離左右年六十猶孺慕也嘗爲母請旌建坊與工匠共舁石泥滑人躓石壓其上而獲全無恙咸謂其有神助

按威愍忠節子陽宦業並進於名臣昌父儒林斯遠文苑不列於理學雖皆從紫陽游其素所成就各不誣也

玉山縣志

卷二十二下

人物志

二十六

斗山以詩重唯南山乃稱逸民都監以節完而蔭監亦旌直道古今之行不同惟其是而已冬佑仲華之上口義固可風靜軒芝亭之辭官性尤獨篤生前無至行而身後欲附其列古人果許我乎古人務實甘受進退於今人今人近名不顧擲揄於古人士君子貴自審矣